



4. November 2020

UKA 2020/36

**Inatsisartut aalajangiiffigisassaattut siunnersuutigineqarpoq Naalakkersuisut nalunaajaatigissagaat, suliffeqarfiit aningaasaqarnikkut suliaqartut pisisartuminnut neqeroorutigilissagaat, isumaqatigiissutit allattariarsuutitalinnik imallit, pisisartup suliffeqarfiullu akunnerminni isumaqatigiissutaat, kalaallisut suliarineqartalissasut.**

(Inatsisartunut ilaasortaq Erik Jensen, Siumut)

Kalaallisut oqaatsivut Nunatsinni pisortatigoortumik oqaasiupput, tamannalu tamanit ataqqineqartariqarpoq. Nunarsuarmioqatigiit akornatsinni oqaatsit inuiaqatigiinnut ilisarnaataasarput pingaarutilerujussuit, ataqqineqartussaallutillu. Siunnersuuteartut oqarneratut kinaassuseqarnermi ersarilluinnartumik tunngaviliisuupput.

Nunatsinni Oqaasiliortut naliliisimapput nunatsinni innuttaasut affai sinnerlugit kalaallisut oqaluttuusut aammalu qallunaatut pisinnaasoqarpiaratik annikitsuinnarmik paasisinnaasut. Tamanna paasilluarlugu Partii Naleqqamiit isumaqarpugut Siunnersuuteqartup siunnersuutaa akueralugu suliassaq aallartinneqartariqartoq, aamma tkusinnaasavut naapertorlugit annertugaasiarsinnaammat.

Ullumikkut nalunngilarput suliffeqarfiit arlallit, soorlu aningaaseriviit, sillimmasiisarfiit, kukkunersiuisartut, inatsisilerituut, niuertut namminersortut sanaartornermillu suliallit kalaallisut oqaatsitsinnik annikitsuinnarmik atuisartut, sullitaminnullu allakkatigut attaveqartarnerat amerlanerpaatigut danskisut pisarluni, kiffartuussinissamullu neqeroorusiaasartut isumaqatigiissutissallu tamatigut qallunaatut allassimasartuullutik. Ilumut, tamakku aamma kalaallisut pinngitsooratik allassimasussaataasariqalerput.

Aningaasaqarnikkut oqartussaaffik suli Nunatsinnut angerlaanneqanngilaq. Taamannali aporfusariqanngilaq uagut nunatsinniit inatsisitigut piumasaqaataasunik allannguuteqartitsinissamut.

Taamannak oqaaseqarluta siunnersuut taperserparput, ataatsimiititaliamilu susassaqartumi suliarineqarnissaa innersuussutigalugu.

Jens Napâtök, Partii Naleraq